


補上古考信錄







錄信考古上補

著述 崔

編主五雲王

編初成集書叢

錄信考古上補

中華民國二十六年六月初版

著者 崔述

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

補上古考信錄卷上

前論一則

三皇五帝之文見於周官而其說各不同。呂氏春秋以黃帝、炎帝、太皞、少皞、顓頊爲五帝。蓋本之春秋傳。而月令因之。大戴記以黃帝、顓頊、帝嚳、堯、舜爲五帝。蓋本之國語。而史記因之。至三統曆則又以包羲、神農、黃帝、堯、舜爲五帝。其說以易傳爲據。而近代五峯、雙湖兩胡氏並用之。秦本紀有天皇、地皇、秦皇之名。而鄭康成則以女媧配羲、農爲三皇。譙周易以燧人、夔均又易以祝融。惟三五曆本秦本紀爲說。而易秦皇爲人皇。其語尤荒唐。不經。鄭康成以下並本補三皇本紀後之編古史者各從所信。至今未有定說。余按書云：皇帝哀矜庶戮之不辜。皇帝清問下民。是帝亦稱皇也。詩云：皇王惟辟。皇王烝哉。是王亦稱皇也。書云：惟皇作極。又云：皇后憑玉几。詩云：皇尸載起。又云：獻之皇祖。傳云：皇祖文王。又云：皇祖伯父昆吾。離騷云：朕皇考曰伯庸。然則皇乃尊大之稱。王侯祖考皆可加之。非帝王之外別有所謂皇者也。且經傳述上古皆無三皇之號。春秋傳僅溯至黃帝。易傳亦僅至伏羲。則謂羲、農以前別有三皇者妄也。燧人不見於傳。祝融乃顓頊氏臣女媧。雖見於記。而文亦不類天子。則以此三人配羲、農以足三皇之數者亦妄也。春秋傳云：黃帝氏以雲紀。炎帝氏以火紀。共工氏以水紀。太皞氏以龍紀。少皞摯之立也。鳳鳥適至。故紀於鳥。自顓頊以來不能紀

遠乃紀於近。此但歷敍古帝紀官之不同耳。初無五帝之名。亦無五德之說也。呂氏緣此。遂刪共工氏。而以五德分屬之。失傳之本意矣。國語云。黃帝能成命。百物以明。民共財。顓頊能修之。帝嚳能序三辰以固民。堯能單均刑法以儀民。舜勤民事而野死。但序此五人之功。爲下郊禘張本耳。亦不稱爲五帝。而謂帝必限以五也。大戴記。遂獨取此爲五帝。而他。不與焉。亦非國語意也。至於易傳五帝。亦偶舉之。而劉歆。遂附會其說。以爲少皞。顓頊。諸帝。周遷其樂。故易不載。誣矣。僞孔傳書序云。伏羲。神農。黃帝之書。謂之三墳。少皞。顓頊。帝嚳。堯。舜之書。謂之五典。其意蓋以墳爲皇書。典爲帝史。然黃帝以帝稱。而反爲皇。名實迕矣。少皞與太皞。炎帝均列於春秋傳。呂紀。月令。而去彼存此。可乎。作此序者。亦爲劉歆所誤。而以炎帝。太皞。爲卽羲。農。故獨取少皞。以代黃帝。而爲五。然則序之出於劉歆。以後。而非安國所撰明矣。蓋三皇。五帝之名。本起於戰國以後。周官後人所撰。是以從而述之。學者不求其始。習於其名。遂若斷不可增減者。雖或覺其不通。亦必別爲之說。以曲合其數。是以各據傳註。互相詆諆。不知古者本無皇稱。而帝亦不以五限。又何必奪彼。以與此也哉。故今但取古天子之見於傳者。次第列之。而絕不以三五約其數焉。五德之謬。三皇。女媧。炎帝。太皞之誤。說並見後篇中。

開闢之初

宋邵堯夫作皇極經世書。謂天地之一終始爲一元。元十二會。會各萬八百年。天開於子。地闢於

丑人生於寅。堯舜當巳。午會之間。自會而下。爲運。爲世。爲年。爲月。爲日。爲時。皆以十二與三十遞乘之。後之儒者。奉爲玉律。莫有異辭矣。余獨以爲不然。夫人之所以異於禽獸者。以其有禮義也。夫婦之道。自生民之初而已然矣。有夫婦於是乎有父子。有父子於是乎有君臣。有君臣於是乎有書契。政事。宮室。粒食。冠裳。葬埋之制。此數者。皆人道之不可廢者。而皆始於義。農以後。然則義農之上。距開闢之初。固無幾時也。若如經世書之言。則是生民僅有九會。而前四會之人。養生送死。初無以大異於禽獸。及其稍知禮義。而天地之化。已將半矣。豈不誣哉。日三十而爲月。月十二而爲歲。其偶然者耳。然且有朔虛有閏餘。不能齊也。至於三十年爲一世。以父子相繼之歲。約略計之耳。日有十二時。歷家隨意分之。以辨刻漏耳。非如日之有出入。月之有朔望。爲一終始。而不可增減者也。春秋傳云。日有十時。今又分時爲二十四時。豈有定數乎。今因是二者之偶同。遂皆以此兩數乘之。其亦鑿矣。且曆法十九年而閏餘一終始。二萬數千餘年而歲差一終始。與元會運世之說皆不合。則經世書之不足信也明矣。曰堯舜不爲中天。然則何以獨盛。曰物之良者皆於其朔。不於其中也。是故日莫良於旦。歲莫良於春。人莫良於孺子。堯舜之時。其猶平旦乎。是天地清明之候也。自堯舜以後。生聚之蕃。文物之盛。未必不過於昔。而其氣益昏而雜。其治益卑而淆。猶之自春徂夏。物生日衆而毒螫亦日多。自少及壯。人知日開而變詐亦日甚也。是故西漢之午在孝武。而孝文則其平旦也。李唐之午在天寶。而貞觀則其平旦也。故孟子亦以平旦之氣爲

性善之驗。吾故曰義。農之上距開闢之初固無幾時也。

〔補〕有天地。然後有萬物。有萬物。然後有男女。有男女。然後有夫婦。有夫婦。然後有父子。有父子。然後有君臣。易序卦傳。

〔存參〕蓋上世嘗有不葬其親者。其親死。則舉而委之於壑。他日過之。狐狸食之。蠅蚋姑嘬之。其類有泚。睨而不視。夫泚也。非爲人泚。中心達於面目。蓋歸反藁裡而掩之。孟子

史記秦本紀云。古者有天皇。有地皇。有泰皇。封禪書云。古者封泰山。禪梁父者七十二家。此言上古者之所始也。春秋緯稱自開闢至於獲麟。凡三百二十七萬六千歲。分爲十紀。一曰九頭紀。二曰五龍紀。三曰攝提紀。四曰合雉紀。五曰連通紀。六曰序命紀。七曰修飛紀。八曰回提紀。九曰禪通紀。十曰流訖紀。流訖當黃帝時。河圖及三五曆稱天皇氏十六頭。澹泊無所施爲而俗自化。木德王。歲起攝提。兄弟十二人。立各一萬八千歲。地皇十一頭。火德王。亦各萬八千歲。人皇九頭。乘雲車。駕六羽。兄弟九人。分掌九州。凡一百五十世。合四萬五千六百年。春秋緯以下。並本唐司馬貞補三皇本紀所采文。

後世序古史者。往往采之。以余觀之。謬莫甚焉。傳曰。上古結繩而治。後世聖人易之以書契。世又傳倉頡始作書契。然則書契之起於義。農以後。必也。義。農以前。未有書契。所謂三皇十紀帝王之名號。後人何由知之。且其歷年如此之久。聖人爲天子者如此之多。其間名臣賢相哲人。知士。且不知凡幾。必無至於義。農之世。而書契猶未興。生者猶無衣服。死者猶無棺槨之理也。夫尙書但

始於唐虞及司馬遷作史記乃起於黃帝。譙周、皇甫謐又推之以至於伏羲氏。而徐整以後諸家遂上溯於開闢之初。豈非以其識愈下則其稱引愈遠。其世愈後則其傳聞愈繁乎。且左氏春秋傳最好稱引上古事。然黃炎以前事皆不載。其時在焚書之前。不應後人所知乃反詳於古人如是也。又按史記鄒衍始爲闕大不經之言。稱引天地剖判以來五德終始。治各有宜。中國名曰赤縣神州。如赤縣神州者九。有裨海環之。莫能相通。如此又九。乃有大瀛海環其外。天地之際焉。然則其說本出於衍。而後世學者又各以其意增飾之耳。當衍之時。列國分爭。疆理不遠。故莫能窮其妄。自隋唐以降。征伐所及。海賈所通。至於夜不能熟羊腓。目可以盡南極。何嘗有所謂裨海九區。天地之際者。衍言之妄。居可觀矣。則其所謂天地剖判。五德轉移者。亦如是而已矣。嗚呼。史記猶以其言爲不經。奈何後人自命爲儒學者。反取之以補經之缺乎。故余於包羲氏之前。但取易序卦傳文冠之篇首。附以孟子上世葬親之語。以見太古之大凡。其餘三皇十紀之說。概不載也。

包犧氏

包犧。一作伏羲。一作庖犧。一作宓犧。今傳旣作包犧。當從之。包犧非太皞。說見後炎帝、太皞篇中。

〔補〕古者包犧氏之王天下也。仰則觀象於天。俯則觀法於地。觀鳥獸之文。與地之宜。近取諸身。遠取諸物。於是始作八卦。以通神明之德。以類萬物之情。易繫辭下傳。按唐虞以前未聞有稱王者。王天下云者。據三代之稱。而加之上古者也。此傳之所以不逮經。

學者不可以辭害意也。

朱子論語集註云。河圖。河中龍馬負圖。伏羲時出。余求其所本。經傳皆無之。書云。大玉。夷玉。天球。

河圖在東序。易大傳云。河出圖。洛出書。聖人則之。皆未言爲龍馬所負。亦不言聖人爲誰何也。春

秋傳史記皆不及伏羲時事。無可證其真僞者。惟漢書五行志引劉歆語。以爲伏羲繼天而王。受

河圖而畫八卦。論語集解引孔安國語。亦以河圖爲八卦。而皆不言所本何書。書孔傳有伏羲王

則以畫八卦之語。此係後人僞撰。故不引。孔氏穎達周易正義云。禮緯含文嘉曰。伏羲德合上下。天應以鳥獸文章。地

應以河圖。洛書。則而象之。乃作八卦。故孔安國等並云。伏羲得河圖而作易。又云。春秋緯云。河以

通乾出天苞。洛以流坤吐地符。河龍圖發。洛龜書感。孔安國以爲河圖則八卦是也。洛書則九疇

是也。然則龍馬負圖之事。乃出緯書。而孔劉采之者。緯書者。異端方士之言耳。朱子何爲而信之

哉。且如緯書之言。則河圖。洛書。同出於伏羲之世。而孔劉乃以八卦。九疇。分屬之。尤不可解。不知

後儒何以皆用之也。傳云。包羲氏之王天下也。仰則觀象於天。俯則觀法於地。觀鳥獸之文。與地

之宜。於是始作八卦。不言則河圖以爲卦也。使畫卦果本於河圖。則此乃當時大事。千古異祥。傳

當特舉之。何得概等諸鳥獸之文而已乎。孔氏穎達固已疑及於此。但以前人舊說。不敢駁證。乃

爲扶同遷就之詞。以爲易理寬宏。何妨更法河圖。亦可謂游移而失據矣。外紀又謂伏羲氏有龍

馬負圖之瑞。故以龍紀官。蓋見補本紀有龍瑞之文。因附會之以爲巧合。不知以龍名官者。乃太

皞非伏羲也。適見其誣而已矣。故今於伏羲氏不載龍馬負圖之事。孔子曰：吾猶及史之闕文也。余惟孔子之言是從焉耳。

〔補〕作結繩而爲網罟，以佃以漁。同上。按傳文所謂取諸某卦者，不過言其理相通耳。非謂必視摹此焉。蓋者疑詞也。今並刪之。後不復註。

補三皇本紀稱伏羲氏造書契以代結繩之政。始制嫁娶，以儷皮爲禮。余按易大傳文，易結繩以書契在黃帝堯舜氏作之後，則必起於黃帝以來明矣。謂造於伏羲氏，乃僞書孔安國序文。此序晉以後人所撰，前人辨之詳矣。至以儷皮爲禮，經傳亦無文。惟譙周古史考言之不足信，故並不載。

外紀稱伏羲氏支干相配爲十二辰，六甲而天道周。又稱黃帝命大撓作甲子，十幹，十二枝，相配以名日。夫伏羲氏既造六甲矣，又何待於黃帝之作之。此蓋所傳異詞而兩采之，故致自相矛盾。要之，謂黃帝時爲近，故今不載於此。

世傳上古之天子有燧人氏、女媧氏、大庭氏、柏皇氏、中央氏、卷須氏、栗陸氏、驪連氏、赫胥氏、尊盧氏、渾沌氏、昊英氏、有巢氏、朱襄氏、葛天氏、陰康氏、無懷氏、譙周古史考以燧人備三皇，謂在庖羲之前。補三皇本紀則本春秋緯，以女媧備三皇，而謂在庖羲之後。至於大庭以下十有五氏，皇甫謐帝王世紀以爲並在庖羲之後。補三皇本紀則據三五曆而以爲並在庖羲之前。其說紛紛不

一、余按春秋傳國語最好稱引上古事。然亦但流黃炎以後。未有稱羲農者也。獨易傳以易故言及於羲農耳。孟子書中有許行爲神農之言。而莊子楚辭尤多稱引黃帝以前者。然則此等語言皆當在戰國以後。蓋是時楊墨盛行。楊氏疾儒者之禮法刑政而矜言無爲之化。墨氏惡當時之厚斂奢用而欲敦儉樸之風。故好稱述上古君臣以求加於三代之法。大抵皆寓言之類。不可以爲實者也。惟大庭氏之庫見於春秋傳。女媧氏之笙簧見於明堂位。然府庫之興富在唐虞以後。況庫猶存於春秋時。世之相隔亦必不遠。而明堂位亦戰國後之書。且序女媧於垂叔之後。未見其必爲上古也。推此而求。則彼十五氏者。縱使果有其人。亦必非黃帝以前之天子矣。補本紀乃據管子謂古封泰山七十二家。夷吾所識十有二首。有無懷氏。不知管子乃後人所僞撰。而封禪亦漢儒之邪說。彼固采戰國時異端小說之言而附會之者。又烏足爲據也哉。且炎帝太皞在黃帝之後。傳記之文甚明也。猶誤以爲庖羲神農。而列之於黃帝之前。況彼十五氏者。傳記之所不言。又惡知其果有與無。果在庖羲之前與其後乎。故今十七氏者皆不載。

神農氏

補三皇本紀云。神農本起烈山。故左氏稱烈山氏之子曰柱。亦曰厲山氏。禮曰厲山氏之有天下是也。余按左傳稱烈山氏。初不言有天下。若禮記祭法之文。乃采之國語者。國語記上古事率荒唐。此蓋亦想當然之詞。不足以爲據也。古者烈厲同音。祭法之厲山乃傳寫之誤。亦非有兩號也。

鄭氏以神農制耒耜。遂以神農當之。而云厲山神農所起。小司馬氏從而采之。誤矣。杜氏左傳註云。烈山氏神農氏諸侯。較鄭氏爲近理。然左傳國語皆未有稱及黃帝以前者。亦未敢必其然。故今並不載神農非炎帝說。見後炎帝條下。

〔補〕包犧氏沒。神農氏作。斲木爲耜。揉木爲耒。耨之利。以教天下。同上。

〔補〕日中爲市。致天下之民。聚天下之貨。交易而退。各得其所。同上。

補本紀稱神農氏重八卦爲六十四。作蜡祭。以赭鞭鞭草木。余按。易大傳言包犧作八卦。網罟。至神農氏則但言其爲耒耨。市易。初無一言及於重卦者。果有此事。曷爲連類及之。而獨遺之乎。康成之徒。因傳文內有取諸益與噬嗑之語。遂臆度而附會之。以爲神農所重。謬矣。傳特泛言其理。何嘗以爲伏羲時止有三畫之離。神農時乃有六畫之噬嗑哉。郊特牲云。伊耆氏始爲蜡。今移之神農氏。於經傳亦未有確據。蓋亦以爲耒耨故臆之耳。至以赭鞭鞭草木。乃方士荒唐之說。尤爲不經。故並不取。

世傳神農始爲本草。今所謂本經者。漢書藝文志有神農黃帝食禁七卷。神農雜子技道二十三卷。外紀因之。遂謂炎帝營藥。一日遇七十毒。遂作方書以療民疾。所謂炎帝。乃沿補本紀之誤。意卽謂神農也。余按書契始於黃帝以後。然猶未有篇策。神農之世安得有策書乎。且本草文淺陋。多用後世地名。少有識者自能辨之。補本紀謂始嘗百草。始有醫藥。此或然耳。然傳記皆無文。而後世方

技之士多託之古聖人者。難以徵信。故今闕之。

〔備覽〕神農伐補遂戰國策。

〔存參〕有爲神農之言者。許行陳相見孟子。道許行之言曰。賢者與民並耕而食。饗殮而治。又曰。從許子之道。則市賈不貳。國中無僞。雖使五尺之童適市。莫之或欺。孟子

補三皇本紀云。神農立一百二十年。納奔水氏之女曰聽諉爲妃。生帝哀。哀生帝克。克生帝榆罔。凡八代。五百三十年。而軒轅氏興焉。綱目前編云。神農在位百四十年。子臨魁八十年。臨魁子承六十年。承子明四十九年。明子宜四十五年。宜子來四十八年。來子襄四十二年。襄曾孫榆罔五十五年。此說世皆信以爲然。余按易傳曰。包犧氏沒。神農氏作。神農氏沒。黃帝堯舜氏作。夫人謂之沒。國謂之亡。不曰包犧神農氏亡。而曰包犧神農氏沒。則是二帝旣沒。其子孫卽不復嗣爲帝也。烏有所謂八世五百餘年者哉。且經之所不書。傳之所不述。彼晉以後之人。何從而知之。補本紀以榆罔爲神農曾孫。則榆罔之後尙當有五世。而綱目前編卽以榆罔爲第八世。其年數亦不符。然則二家之說。已自不合。學者又何由知其孰是而信之乎。夫事略者易知。詳者難考。神農之與炎帝。經傳之文甚明。此易知者也。而二家尙不知其爲兩人。況其子孫之名之年之譜牒。反能知之。而歷歷不爽。有是理耶。且唐虞以前。初未嘗有繼世爲天子之事也。有聖人者出。則天下尊之爲帝。聖人者沒。則已耳。其子孫皆不嗣爲帝也。又有聖人者出。然後天下又尊之。無所爲繼。亦

無所爲禪也。自唐、虞而後有禪。自夏、殷而後有繼。故孔子曰：唐、虞禪，夏、殷、周繼。如之何其可以後世之事例上古也。齊桓之霸也，僅一世，而晉文之霸也，乃十一世，不得以其後之繼霸而遂謂其前之亦繼霸也。晉文襄之霸也，其卿未有世者，間有父子皆爲卿者，而初不襲位於其父卒之日。景厲以後，荀林父卒而子庚代之，士會老而子燮繼之，而卿遂爲世及。魯、鄭亦然，不得以其後之繼卿而遂謂其初之亦繼卿也。夫古之天子亦若是而已矣。故今於諸家所載神農以後諸帝，概削之不錄焉。嗚呼！後世之儒所以論古之多謬者，無他，病在於以唐、宋之事例三代，以三代之事例上古，以爲繼世有天下自義，農已然，故於虞、夏授受之際，妄以己意揣度，以致異說紛然而失聖人之真。故余於神農之世，先發其端，學者知唐、虞以前原無禪繼，然後堯、舜、禹、啓相承之事，可得而論說，並詳後通考及堯、舜、禹、啓篇中。

補本紀稱包犧氏女媧氏皆蛇身人首，神農氏人身牛首。余按唐柳子厚觀八駿圖說，辨此甚明。今載其文於左，惟其所引書以牛首爲伏羲，與此小異，要之其誣則一，亦不足分別也。

柳子厚觀八駿圖說：古之書有記周穆王馳八駿，升崑崙之墟者，後之好事者爲之圖，觀其狀甚怪，咸若騫、若翔、若龍、鳳、麒麟、若螳螂然。世聞其駿也，因以異形求之，則其言聖人者亦類是矣。故傳伏羲曰牛首，女媧曰其形類蛇，孔子如俱頭，若是者甚衆。孟子曰：何以異於人哉？堯、舜與人同耳。今夫馬者，駕而乘之，或一里而汗，或十里而汗，或千百里而不汗者，視之毛物尾鬣，四足而蹄。

斲草飲水一也。推是而至於駿，亦類也。今夫人有不足爲負販者，有不足爲吏者，有不足爲士大夫者，有足爲者，視之圓首橫目，食穀而飽，肉絺而清，裘而燠，一也。推是而至於聖，亦類也。然則伏羲氏、女媧氏、孔子氏，是亦人而已矣。驩、騶、白羲、山子之類，若果有之，是亦馬而已矣。又烏得爲牛、爲蛇、爲俱頭、爲龍、鳳、麒麟、螳螂然也哉。

補本紀稱包犧氏作二十五絃之瑟，神農氏作五絃之瑟。余按風會之開必有其漸，故包犧氏教佃漁，神農氏教耕耨，黃帝氏垂衣裳。雖聖人不能一世而盡創也。然則禮樂之興當在唐虞之世。包犧、神農未暇此也。安有茹毛飲血而吹笙鼓瑟者哉。苟能制繭成絲，則何不先爲衣冠而乃以爲絃。苟能斲木成器，則何不先爲棟宇棺槨而乃以爲瑟也。此皆後人猜度附會之言，故並不取。周官太卜有三易之名，一曰連山，二曰歸藏，三曰周易。杜子春云：連山，伏羲歸藏；黃帝，孔穎達云：神農曰連山氏，亦曰烈山氏；黃帝曰歸藏氏。余按易傳言易詳矣。春秋傳亦多說易者，然皆未有連山、歸藏之名。周官乃後人所撰，其然否未可知也。即使果然，亦當出於後世。鄭氏以爲夏殷者，或有之。若羲、農之世，則未有篇策，安得有文字傳於後世哉。至因康成以厲山爲神農之誤，而並連山之名歸之，則尤謬矣。故今不取。

黃帝氏

史記五帝本紀云：黃帝姓公孫，名曰軒轅。又云：黃帝爲有熊氏。按國語云：黃帝姓姬，且公孫者，公

之孫也。公族未及三世則無氏之以公孫非姓也。況上古之時安有是哉。大戴記云。黃帝曰軒轅。又曰黃帝居軒轅之邱。其意蓋謂因所居以爲號耳。非謂軒轅爲黃帝名也。有熊之稱亦不見於傳記。本紀乃以軒轅爲名而號有熊。殊失大戴之意。漢書律曆志云。黃帝始有軒冕之服。故號曰軒轅。謂軒轅爲號似矣。而謂因始有軒冕之故。則亦出於臆度而已。又大戴記。史記皆以黃帝爲少典子。蓋本之國語。然國語本不足據。故今並闕之。說並見後戰於阪泉條下。

〔補〕神農氏沒。黃帝堯舜氏作。易繫詞下傳。

〔備覽〕神農氏世衰。諸侯相侵伐。暴虐百姓。而神農氏弗能征。於是軒轅乃習用干戈以征不享。諸

侯咸來賓從。史記五帝本紀。

大戴記五帝德篇云。黃帝生而神靈。弱而能言。幼而叡。或作慧。史記作徇。齊長而敦敏。成而聰明。又云。順

天地之紀。幽明之故。史記作占。死生之說。存亡之難。時播百穀草木。故教化淳。鳥獸昆蟲。此八字。史記作淳化鳥獸。

虫。歷離史記作羅。日月星辰。極田史記作水波。土石金玉。勞史記勞下有勤字。心力耳目。節用水火材物。余按神

靈五句。乃後人想像推崇之詞。聖人大抵如是。非獨黃帝然也。而叡齊敦敏聰明。亦初無先後可

分。死生存亡數語。頗類楊氏即所謂黃老家。時播以下文多難解。不如史記之文明順。不知戴記之文久

而訛邪。抑司馬氏潤色之邪。要之皆係膚闕之辭。初無可指事實。且文亦卑弱。與堯典皋陶謨首

節大不類。顯爲後人所撰。故並不錄。

〔補〕黃帝氏以雲紀。故爲雲師而雲名。左傳昭公十七年

本紀云。黃帝舉風后。力牧。常先。大鴻。以治民。漢書藝文志。敍兵書。有風后十三篇。力牧十五篇。世紀遂從而附會之。言黃帝夢風吹塵垢皆去。人執千鈞之弩。驅羊萬羣。曰。天下豈有姓風名后。姓力名牧者哉。於是求而得之。以爲將相。余按黃炎之世。卿相之名未有見於傳者。則四人恐亦後人之託言。縱使有之。而其時未有典冊。則兵法非其所著明矣。后者君也。風后蓋謂風國之君。古未有姓名連稱者。烏得以風力爲姓而后。牧爲名也哉。至垢去土爲后。人驅羊爲牧。此特後世之謎語耳。稍知文學者。恥言之。而綱目前編。廣輿記。皆從而采之。嘻。亦異矣。今一概不錄。

世之言律者云。律有十二。六爲律。六爲呂。黃帝使伶倫採竹於解谷。雄聲六。雌聲六。以應十二月。數曰黃鍾。曰大呂。曰大蕤。曰夾鍾。曰姑洗。曰仲呂。曰蕤賓。曰林鍾。曰夷則。曰南呂。曰無射。曰應鍾。余按律之見於經傳者。莫先於典謨。然臯陶謨但云六律。不言爲十二也。春秋傳云。一氣二體。三類四物。五聲六律。七音八風。九歌以相成也。孟子云。師曠之聰。不以六律。不能正五音。皆云六律。無云十二律者。如果律有十二。不當咸稱爲六。果有六律六呂。亦不當皆舉律而遺呂也。惟國語載伶州鳩言。六律之外。復有六間。自大呂至應鍾云云。然亦未嘗與黃鍾等。平行爲十二也。自呂氏春秋始。以律與曆強相附會。以十二律應十二月。而劉歆。班固等。遞述之。非古也。國語之文。固已多所附會。至呂氏春秋所採。乃鄒衍陰陽家之言耳。學者不信經傳之文。而聞異端之說。則喜

道之甚哉。其可異也。又按大呂、姑洗、無射，皆古鍾名。黃鍾、夾鍾、林鍾、應鍾，其名雖不見於經傳，然皆名之爲鍾，則亦本鍾名也。謂其以律名名鍾乎？當鍾未鑄之時，何由預知後世之以名鍾而先以夾鍾、應鍾名之？蓋古六律之名本不可考。後人因某鍾之聲近於某律，遂取鍾名以名之耳。非黃帝所制也。且十二律果制於黃帝，伶州鳩何不述之，而但泛稱爲古之神瞽乎？由是言之，黃鍾、大呂之名皆起於春秋戰國以後，尙未知其與舜之六律果相應否。況於其度之長短廣狹有何確據，而乃苦爭之於九分十分之異，亦惑矣。劉歆豈聖人與，何以後之學者奉歆之說如奉聖人言也。

〔附錄〕遇黃帝戰於阪泉之兆。左傳僖公二十五年

〔備覽〕修德振兵，與炎帝戰於阪泉之野，三戰然後得其志。史記五帝本紀

晉語云：少典娶於有蟠氏，生黃帝、炎帝。黃帝以姬水成，炎帝以姜水成，而成而異德。故黃帝爲姬，炎帝爲姜。二帝用師以相濟也。異德之故也。余按春秋傳云：黃帝氏以雲紀，故爲雲師，而雲名。炎帝氏以火紀，故爲火師，而火名。觀其文義，乃二帝各自爲國，各自爲代，非兄弟也。易傳云：神農氏沒，黃帝、堯、舜氏作。又云：黃帝、堯、舜垂衣裳而天下治。則是黃帝聖人也。炎帝雖不可知，然在上古而爲人所歸，則亦賢人也。果聖賢與，必無同胞兄弟而用師以相攻伐之理。且所謂異德者，果何哉？舜之與象，周公之與管叔，皆不異姓也。如之何其可以德異而並姓異之乎？蓋晉語此文，特欲掩

文公納懷嬴之失而假託於古之聖人。正如齊東野人之語謂堯北面而朝舜者。後人奈何遽從而信之邪。故今並不從說。並見後條及炎帝篇中。

〔附錄〕蚩尤惟始作亂。延及于平民。罔不寇賊。鴟義姦宄。奪攘矯虔。書呂刑

〔備覽〕黃帝伐涿鹿而擒蚩尤。戰國策

〔備覽〕蚩尤作亂。不用帝命。於是乃徵師諸侯。與蚩尤戰於涿鹿之野。遂禽殺蚩尤。而諸侯咸尊軒轅爲天子。史記五帝本紀

漢書藝文志敍兵法。有黃帝十六篇。圖二卷。馬鑄中華古今注引河圖文云。黃帝攝政前。有蚩尤兄弟八十一人。並獸身。人語。銅頭鐵額。食砂石子。造立兵仗。刀戟大弩。威震天下。天遣元女授黃帝兵法符制。以服蚩尤。余按易大傳文。書契之興。弓矢之作。皆在黃帝以降。黃帝之時。安得有兵書及圖傳於後世哉。此乃戰國之時。權謀之士所作。僞託之黃帝耳。至於獸身人語。元女授法。語尤不經。蓋唐以前人多好怪。見此等語。以爲新奇。輒采之以入書。而不知其惑世爲甚大也。故今並論之。

古今注云。指南車起黃帝。與蚩尤戰於涿鹿之野。蚩尤作大霧。兵士皆迷。於是作指南車以示四方。遂擒蚩尤。又云。華蓋黃帝所作也。與蚩尤戰於涿鹿之野。常有五色雲氣。金枝玉葉。止於帝上。有花葩之象。故因而作華蓋也。余按易大傳文。服牛乘馬在黃帝。堯舜氏作之後。則黃帝時尙未

必有車也。縱使有之。制車之始。亦豈遂能工巧如是。至於華蓋之作。文飾益盛。尤非上古儉樸之風。蓋皆後人之所託稱。故今不錄。

〔存參〕黃帝能成命百物以明民其財。語

此語雖未必確實。然尙無大謬。姑列之存參。

本紀云。黃帝披山通道。未嘗寧居。東至於海。登丸山及岱宗。西至於空桐。登雞頭。南至於江。登熊湘。北逐葷粥。合符釜山。而邑於涿鹿之阿。遷徙往來無常處。以師兵爲營衛。又云。置左右大監。監於萬國。萬國和而鬼神山川封禪與爲多焉。獲寶鼎。迎日推策。余按。此皆戰國秦漢之間。方士異端所述。所謂黃老家言。陰陽家言是也。蓋既託其術於黃帝。因僞撰黃帝之事以實之耳。堯自舉舜以前。其事尙不可詳考。況黃帝踪跡之所至乎。故今不錄。

世所傳素問一書。載黃帝與岐伯問答之言。而靈樞陰符經。或亦稱爲黃帝所作。至戰國諸子書述黃帝者尤衆。若莊子書稱黃帝問道於廣成子之類。余按。黃帝之時尙無史冊。安得有書傳於後世。且其語多淺

近。顯爲戰國秦漢間人所撰。蓋戰國時楊墨之徒欲絀堯舜。故稱堯舜以前之黃帝以駕乎其。上而工於藝術者亦欲藉古聖人之名以取重於世。因假託之以爲言耳。此類甚多。不足縷辨。亦不勝縷辨也。姑舉其略以例其餘。晉語云。黃帝之子二十五人。其同姓者二人而已。唯青陽與夷鼓皆爲己姓。青陽。方雷氏之甥也。夷鼓。彤漁氏之甥也。其同生而異姓者。四母之子。別爲十二姓。凡

黃帝之子二十五宗。其得姓者十四人。爲十二姓。姬、酉、祁、己、滕、葳、任、荀、僖、佶、儂、依是也。惟青陽與倉林氏同於黃帝。故皆爲姬姓。後之言姓者多宗之。余按上古之時。人情樸略。容有未受姓者。故因錫土而遂賜之。所以禹貢有錫土姓之文。非每人皆賜之以姓也。安有同父而異姓者哉。姓也者。生也。有姓者。所以辨其所由生也。苟同父而各姓其姓。則所由生者無可辨。有姓曷取焉。且十二姓之見於傳者。姬、祁、己、任、姁、五姓而已。然皆相爲昏姻。后稷取於姁。王季取於任。春秋時晉之欒與祁昏。魯之孟與己昏。而姬、劉、祁、范乃世爲昏姻。皆無譏者。果同祖也。可爲昏乎。若同祖者。易其姓而即可爲昏。則吳之孟子何譏焉。春秋傳云。宿、須、句、顓、臾。風姓也。實司太皞。與有濟之祀。又云。炎帝爲火師。姜姓其後也。觀其文。皆似古帝王之子孫。世守其姓而不改者。唯虞後本姚姓。而陳乃媯姓。故晉史趙以爲周之所賜。蓋偶然之事。時或有他故焉。要之媯猶姚耳。非姚與媯之。遂可以相爲昏也。自國語始有一人子孫分爲數姓之說。而大戴記從而衍之。史記又從而采之。遂謂唐虞三代共出一祖。而帝王之族姓遂亂雜而失其真矣。然則是評古聖而惑後儒者。皆國語爲之濫觴也。且前旣云青陽與夷鼓爲己姓。後又云青陽與倉林爲姬姓。是青陽一人而有兩姓矣。此文旣云黃帝之子青陽、夷鼓皆爲己姓。鄭語又云。祝融之後己姓。昆吾、蘇、顧、溫、董。是己一姓。而又有兩祖矣。其自相矛盾如是。烏可爲信哉。晉語此文。本因文公之納懷嬴而爲之掩飾者。是。以其情誣而不忘。其辭游而自窮。縱令果出胥臣。亦不足以爲據。況後人之所僞託乎。而世之

學者乃皆相沿。以爲受姓之原固然。亦可異矣。故今並不取說。並見前條下。

史記封禪書稱齊人公孫卿有札書言黃帝僊登於天。因所忠欲奏之。所忠視其書不經。疑其妄。書卿因嬖人奏之。上大說。乃召問卿對曰。黃帝采首山銅鑄鼎於荆山下。鼎既成。有龍垂胡髯。下迎黃帝。黃帝上騎。羣臣後宮從上者七十餘人。龍乃上去。餘小臣不得上。乃悉持龍髯。龍髯拔墮。墮黃帝之弓。百姓仰望黃帝既上天。乃抱其弓與胡髯號。後世因名其處曰鼎湖。其弓曰烏號。漢王充論衡嘗辨其謬。今錄於左。

論衡道虛篇。世稱堯若腊。舜若胝。心愁憂苦。形體羸癯。使黃帝致太平乎。則其形體宜如堯。堯堯舜不得道。黃帝升天。非其實也。使黃帝廢事修道。則心意調和。形體肥勁。是與堯舜異也。異則功不同矣。功不同。天下未太平而升封。又非實也。五帝三王皆有聖德之優者。黃帝不在上焉。如聖人皆仙。仙者非獨黃帝。如聖人不仙。黃帝何爲獨仙。世見黃帝好方術。方術仙者之業。則謂帝仙矣。又見鼎湖之名。則言黃帝採首山銅鑄鼎。而龍垂胡髯迎黃帝矣。是與說會稽之山無以異也。夫山名曰會稽。卽云夏禹巡狩。會稽於此山上。故曰會稽。夫禹至會稽治水。不巡狩。猶黃帝如方伎。不升天也。無會稽之事。猶無鑄鼎。龍垂胡髯之實也。里名勝母。可謂實有子勝其母乎。邑名朝歌。可謂民朝起者歌乎。

余按黃帝升天之說。本不足辨。司馬氏載之。正以見其荒謬耳。王氏以爲非實。是矣。然言黃帝好

方術則猶惑於世之邪說而未之察也。上古原無方術。而黃帝垂衣裳而天下治。亦豈至爲方士之所欺哉。世之言神仙者多託之於黃帝老子。類此者非一。而文學之士亦有采之入書者。恐其久而惑世。故錄此篇以例其餘。

補上古考信錄卷下

炎帝氏

漢書律曆志以炎帝爲神農氏。太皞爲包羲氏。後之學者編纂古史皆遵之無異詞。以余考之不然。易傳曰。庖羲氏沒。神農氏作。神農氏沒。黃帝堯舜氏作。是庖羲神農在黃帝之前也。春秋傳曰。黃帝氏以雲紀。故爲雲師而雲名。炎帝氏以火紀。故爲火師而火名。共工氏以水紀。故爲水師而水名。太皞氏以龍紀。故爲龍師而龍名。是炎帝太皞在黃帝之後也。庖羲神農在黃帝之前。炎帝太皞在黃帝之後。然則庖羲氏之非太皞。神農氏之非炎帝也明矣。史記五帝本紀曰。軒轅氏之時。神農氏世衰。諸侯相侵伐。暴虐百姓。而神農氏弗能征。又曰。炎帝欲侵陵諸侯。軒轅乃脩德振兵。以與炎帝戰於阪泉之野。三戰然後得其志。夫神農氏旣不能征諸侯矣。又安能侵陵諸侯。旣云世衰矣。又何待三戰然後得志乎。且前文言衰弱。凡兩稱神農氏。皆不言炎帝。後文言征戰。凡兩稱炎帝。皆不言神農氏。然則與黃帝戰者自炎帝。與神農氏無涉也。其後又云。諸侯咸尊軒轅爲天子。代神農氏。又不言炎帝。然則帝於黃帝之前者自神農氏。與炎帝無涉也。封禪書云。古者封泰山。禪梁父者七十二家。而夷吾所記者十有二焉。神農封泰山。禪云云。炎帝封泰山。禪云云。夫十有二家中既有神農。復有炎帝。其爲二人明甚。烏得以炎帝爲神農氏也哉。戰國策曰。神農

伐補遂。黃帝伐涿鹿而擒蚩尤。亦列神農於黃帝前而不云炎帝。晉語曰：黃帝以姬水成，炎帝以姜水成，亦列炎帝於黃帝後而不云神農。春秋傳云：炎帝爲火師，姜姓其後也。與國語炎帝姜姓之說合。皆云炎帝不云神農。孟子書有許行者爲神農之言，並耕同賈之說，語雖不經，然亦因神農有作耒耜爲市廛之二事故託之。亦云神農不云炎帝，蓋自史記以前未有言庖羲風姓爲龍師。神農姜姓爲火師者，亦未有言太皞書八卦作網罟，炎帝制耒耜爲市廛者。然則庖羲氏之非太皞，神農氏之非炎帝也明矣。自戰國以後，陰陽之術興，始以五行分配五帝，而呂氏春秋采之。月令又述之，遂以太皞爲木，爲春，炎帝爲火，爲夏，少皞爲金，爲秋，顓頊爲水，爲冬，黃帝爲土，爲中央。然亦但言其德各有所主，不謂太皞先於炎帝，炎帝先於黃帝也。宣元以後，讖緯之學日盛，劉歆不考其詳，遂以五行相生之序爲五帝先後之序，而太皞遂反前於炎帝，炎帝遂反前於黃帝矣。然考之易傳，前乎黃帝者爲庖羲，神農其名不符。考之春秋傳，炎帝太皞皆在黃帝之後，其世次又不合。於是不得已，謂太皞卽庖羲氏，炎帝卽神農氏，而春秋傳文爲逆數，謂少皞受黃帝，黃帝受炎帝，炎帝受共工，共工受太皞，故先言黃帝，上及太皞也。嗚呼！有是文理也哉！傳云：火出於夏，爲三月，於商爲四月，於周爲五月。又云：自虞以上爲陶唐氏，在夏爲御龍氏，在商爲豕韋氏，在周爲唐杜氏，晉主夏盟爲范氏。此皆由今溯昔，然且不用逆數，況於泛舉古帝王之沿革，乃反無

不斥其誣。反欲曲全歆說。謂神農後子孫亦稱炎帝。黃帝與炎帝戰於阪泉。豈黃帝與神農身戰乎。夫神農果卽炎帝。其子孫對黃帝而言稱炎帝。猶可也。繼神農之後而別之曰炎帝。可乎。且封禪十二家皆易姓受命者。史記詩傳之文甚明。若炎帝爲神農子孫。則是十一家。非十二家矣。或云。譙周古史考卽以神農、炎帝爲兩人。與史記同。惜余未得見其書也。由是言之。誤劉歆。班固者。呂紀月令而誤杜預。司馬貞者。歆與固也。自是以後。學者益以口耳相傳。而黃、炎之世次歷二千年。遂無復有正之者矣。曰然則史記黃帝之後何以不列炎帝。太皞曰史記亦不列少皞。不但太皞。炎帝也。將亦謂少皞在黃帝之前乎。蓋遷之敍五帝本之大戴記。記雖刪於大戴。而書實在遷前。而記本之魯語。然魯語但舉其有功者言之。實未嘗有五帝之名。亦不謂其間不得復有帝也。若月令之五帝。則本之春秋傳。然傳實亦未有五帝之說。大抵後人之說皆沿之古人而附會之。以致浸失其意。要之。自司馬遷以前。未有言炎帝。太皞之爲庖羲。神農者。而自劉歆以後。始有之。學者當取信於古傳記。不必斤斤焉。執異端讖緯之說。後儒附會之言。以自益其惑也。

〔補〕

炎帝氏以火紀。故爲火師而火名。左傳昭公十七年。

晉語云。少典娶於有嬌氏。生黃帝。炎帝。黃帝以姬水成。炎帝以姜水成。成而異德。故黃帝爲姬。炎帝爲姜。二帝用師以相濟也。韋昭國語解云。神農在黃帝前。黃帝滅炎帝。滅其子孫耳。言生者。言二帝本所生出也。小司馬索隱又云。少典者。諸侯國號。非人名也。炎、黃二帝。凡隔八帝五百餘年。

若以少典是其父名。豈黃帝經五百餘年而始代炎帝後爲天子乎。後之纂古史者咸以其言爲然。余按國語所云生者本謂一父一母所生。文甚明也。幼同生而長不同德。故曰成而異德。如韋氏之說是與炎帝同生者。乃黃帝之遠祖。與黃帝用師者。乃炎帝之孫耳。則所謂成而異德者。其祖乎。其孫乎。如小司馬之說是生炎帝者。一少典氏。生黃帝者。一少典氏。則所謂娶於有蟫氏者。炎帝之父乎。黃帝之父乎。於文皆不通矣。況炎帝既在黃帝前數百年。則當先言炎帝。不當每文皆先言黃帝也。蓋二家之失。在誤信劉歆、班固之言。以炎帝爲神農。是以世代不符。雖委曲以爲解。卒輾轉而不通。若但據左傳、史記文。則炎帝承黃帝自可同時。不必曲爲之說也。然國語之文。本亦出於附會。故今並不載。說已詳前黃帝篇中。

〔備考〕炎帝爲火師。姜姓其後也。左傳哀公九年。

按左傳原姜姓者二。一此文以爲炎帝之後。一莊二十三年以爲太嶽之後。或太嶽卽出於炎帝。與其說猶可通也。國語原姜姓者三。一晉語謂炎帝姓姜。與此文合。一周語謂共工之從孫四岳賜姓姜。蓋卽傳之太嶽。但炎帝旣姓姜。則非至四嶽而始賜姓。共工承炎帝後而改制度。則非出於炎帝明甚。二篇必有一誤也。一鄭語謂姜爲伯夷之後。伯夷與四岳比肩事舜。齊一國安得祖兩人乎。大抵國語所述姓氏皆不足據。竊意左傳猶近古。故列之以備考。

共工氏

漢書律曆志列共工於神農之前。余按春秋傳共工在黃炎後。其文甚明。劉歆泥於呂紀五德之說。誤以傳爲逆數。遂以炎帝爲神農。太皞爲伏羲。因致失共工之世次耳。今旣據傳文正其失。則共工固當次之於此。說已詳前炎帝篇中。

〔補〕共工氏以水紀。故爲水師而水名。左傳昭公十七年。

〔存參〕共工虞於淇樂。淫失其身。欲壅防百川。墮高湮廩。以害天下。皇天弗福。庶民弗助。禍亂並興。

共工用滅。周語。

魯語云。共工氏之伯九州也。其子曰后土。能平九土。補本紀云。女媧末年。諸侯有共工氏。任智刑以強。霸而不王。與祝融戰。不勝而怒。乃頭觸不周山崩。天柱折。地維缺。女媧乃鍊五色石以補天。斷鼇足以立四極。聚蘆灰以止淫水。於是地平天成。不改舊物。余按共工氏之爲帝爲霸。不可考矣。但以春秋傳推之。則與黃炎二皞固未有差別也。不知國語有所傳耶。抑以共工似官名。不似代名。遂臆度之而云然耶。大抵國語之文附會者多。后土本非人名。乃不云其子曰勾龍。而云其子曰后土。其舛如是。固不可爲據也。所稱虞於淇樂云者。或其子孫之事。亦未可知。少皞之衰。九黎亂德。神農氏世衰。諸侯相侵伐。楚語史記並有是言。則於共工亦何怪焉。故姑存之於此。至於觸山補天之說。本之淮南子。淮南又因楚辭之文而附會之者。楚辭淮南本皆荒唐之藪。不可爲實。而楚辭但言地傾。初無觸山補天之說。亦絕不言爲共工也。頭能觸山而使之崩。山能傾天地。

而使之缺折。則魯陽之揮日。愚公之移山。真可謂平平無奇矣。小司馬乃信以爲實而載之。史吾恐千百年後。將有采稗官小說以補正史之缺者。況祝融乃顓頊之裔。安得越千百年之前而與共工戰乎。大抵唐人好奇而輕信。不辨黑白而一概取之。率皆如是。亦不足盡辨也。

太皞氏

太皞或作太昊。按春秋傳作太皞。傳文近古。或當不誤。從之。

〔補〕太皞氏以龍紀。故爲龍師而龍名。左傳昭公十七年。

〔備考〕任、宿、須、句、顓、臾、風、姓也。實司太皞與有濟之祀。左傳僖公二十一年。○陳太皞之虛也。左傳昭公十七年。

漢書律曆志以春秋傳之太皞氏爲卽易傳之包羲氏。患其世次不合。遂以春秋傳文爲逆數。余按傳文如果逆數。則當由少皞以至極前之包羲。乃由黃帝逆數以至包羲。而忽以極後之少皞承之。文理尙可通乎。且太皞、少皞二帝不同姓。若其時又不相及。則何爲皆以皞名。而太皞紀官爲龍。少皞紀官爲鳳。亦似相比然者。然則少皞氏固當繼太皞而帝。左傳非逆數。太皞非包羲矣。又按春秋傳。太皞之後曰任、宿、須、句、顓、臾。其虛在陳。少皞之後曰郟。其虛在魯。顓、頊之後曰陳。其虛在衛。而黃、炎、共工三代惟炎帝之後見於傳。至其虛則皆無聞焉。豈非以近者易考而遠者難詳乎。國語雖嘗述黃帝、共工之後。然其文殊乖舛不足據。然則郟子所言之世次。其非逆數亦明矣。故今列太皞氏於共工之後。從左傳也。餘並見前炎帝篇中。

少皞氏

漢書律曆志云。少皞號曰金天氏。余按。金天氏之名見於春秋傳。但云裔子爲元冥師而已。未言爲少皞也。劉歆蓋以月令。秋帝少皞。秋於行爲金。故謂金天氏爲少皞耳。不知五德之說。本鄒衍之妄談。且顓頊不取號於水。寧少皞必取號於金乎。少皞氏之子雖嘗爲元冥。然烈山氏之子柱爲稷。周棄亦爲稷。顓頊氏之子黎爲火正。高辛氏之子閼伯亦爲火正。則元冥一官亦不必少皞氏之子孫。而后可爲也。故今寧闕之。說並詳前黃帝以下諸帝篇中。皞或作昊。今從左傳作皞。已詳前篇。

〔補〕少皞摯之立也。鳳鳥適至。故紀於鳥。爲鳥師而鳥名。左傳昭公十七年。

〔備考〕秋。郟子來朝。公與之宴。昭子問焉。曰。少皞氏鳥名官。何故也。郟子曰。吾祖也。我知之。左傳昭公十七年。

○因商奄之民。命以伯禽而封於少皞之虛。左傳昭公十四年。

〔補〕鳳鳥氏。曆正也。元鳥氏。司分者也。伯趙氏。司至者也。青鳥氏。司啓者也。丹鳥氏。司閉者也。祝鳩氏。司徒也。鵙鳩氏。司馬也。鴈鳩氏。司空也。爽鳩氏。司寇也。鶡鳩氏。司事也。五鳩。鳩民者也。五雉。爲五工正。利器用。正度量。夷民者也。九扈。爲九農正。扈民無淫者也。左傳昭公十七年。

〔備考〕昔爽鳩氏始居此地。季荊因之。有逢伯陵因之。蒲姑氏因之。而後太公因之。左傳昭公二十年。

大戴記帝繫篇云。黃帝產元囂。元囂產螭極。螭極產高辛。黃帝產昌意。昌意產高陽。又云。黃帝取

於西陵氏之子。謂之嫫祖氏。產青陽及昌意。青陽降居泝水。昌意降居若水。自史記始以青陽爲元囂。而漢書律曆志遂並以青陽爲少皞。而其子孫名摯。由是皇甫謐以來諸編古史者皆以少皞爲黃帝之子矣。余按大戴史記之文本難徵信。然大戴云。青陽降居泝水。是明謂青陽不爲天子矣。史記云。自元囂與螭極皆不得在位。至高辛卽帝位。是亦謂元囂不爲天子矣。青陽元囂皆不爲天子。惡得以爲少皞氏也哉。且以摯爲少皞子孫之名。則當鳳鳥未至之前。將以何者名其官乎。蓋此皆緣劉歆誤以春秋傳郟子之言爲逆數。而炎帝共工太皞皆在黃帝前。至少皞則不可復謂其在太皞前。而大戴史記又皆無少皞之代。故妄意其卽青陽耳。不知四代實皆在黃帝後。史記自沿大戴之文。以顓頊直繼黃帝而遺之。不必曲爲說以附會之也。然史記以元囂爲青陽。亦非大戴本文之意。蓋其前文云。黃帝產元囂。產昌意者。乃因敝高陽高辛之世系而溯及其祖父。非謂黃帝止有此二子也。後文云。黃帝取於西陵氏之子。產青陽及昌意者。乃因二人同母。故因昌意而並及之。非必此二人卽前二人也。司馬氏見其前有元囂而無青陽。後有青陽而無元囂。遂妄意爲一人。誤矣。又國語以青陽爲方雷氏之甥。亦與大戴文異。大抵國語大戴史記本皆不足爲據。而漢志以爲少皞。說尤荒唐。皆由於不察前人之言而妄以意度之。是以愈轉愈誤。而更後之人又震於其名。以爲必有所據。而云然。是以帝王之事顛倒錯亂。不可復正。而不知其所據皆此類也。故今並不取。

顓頊氏

大戴記云。高陽是爲帝顓頊。按春秋傳有高陽氏。有顓頊氏。而爲一爲二。無明文。唯離騷自謂高陽之苗裔。而鄭語以楚爲祝融之後。左傳以祝融爲顓頊氏之子。則似高陽果顓頊也。然鄭語云。黎爲高辛氏火正。楚語云。顓頊命火正黎司地。又似顓頊爲高辛者。要之。唐虞以前事多難考。國語離騷皆難據以立說。與其誤斷而顛倒之。不若闕疑而姑置之。之爲愈也。

〔補〕自顓頊以來爲民師而命以民事。左傳昭公十七年。

〔備考〕陳顓頊之族也。左傳昭公八年。○衛顓頊之虛也。故爲帝邱。左傳昭公十七年。

大戴記五帝德篇云。顓頊洪淵以有謀。疏通而知事。養材以任地。履時以象天。依鬼神以制義。治氣以教民。潔誠以祭祀。北至於幽陵。南至於交趾。西濟於流沙。東至於蟠木。動靜之物。小大之神。日月所照。莫不祇勵。余按洪淵。疏通二語。乃賢哲之常事。養材履時二語。卽黃帝之順天地之紀。歷離日月星辰。時播百穀草木等事也。其餘云云。亦皆古賢帝王通用之言。非有事實可指不可移之他人者也。其爲後人所撰甚明。故今並不錄。說並見前黃帝篇中。

帝嚳氏

按春秋傳有高辛而無嚳。至國語始稱嚳。大戴記始以嚳爲高辛。國語固多附會。然妄合姓氏。謬舉神怪則有矣。若無故撰此一代。恐國語尙未至是。且言之不一而足。理固當有之。不容略也。傳

既無文。故卽以國語文補之。唯以譽爲高辛。則未敢決。寧闕之可也。說並見前顓頊篇中。

〔補〕帝譽能序三辰以固民。魯語。

〔存參〕星與日辰之位皆在北維。顓頊之所建也。帝譽受之。周語。

大戴記五帝德篇云。帝譽生而神靈。自言其名。博施利物。不於其身。聰以知遠。明以察微。順天之義。知民之德。仁而威。惠而信。取身而天下服。取地之財而節用之。撫教萬民而利誨之。歷日月而迎送之。明鬼神而敬事之。其色郁郁。其德嶷嶷。其動也時。其服也士。執中而獲天下。日月所照。風雨所至。莫不從順。余按。此所稱生而神靈。自言其名者。卽黃帝之生而神靈。弱而能言也。聰以知遠。明以察微者。卽黃帝之成而聰明也。明鬼神而敬事之者。卽顓頊之潔誠以祭祀也。日月所照。風雨所至。莫不從順者。卽顓頊之日月所照。莫不祇勵也。順天之義。取地之財者。卽黃帝之順天地之紀。顓頊之養材以任地。履時以象天也。蓋撰此文者。亦苦於無可言。故少竄易其詞。而實仍卽前之所云云也。故今並不錄。說並見前黃帝、顓頊篇中。

黃帝以後諸帝通考

傳文有不能詳其世代者。統錄於此。

〔補〕黃帝堯舜垂衣裳而天下治。易繫辭下傳。

〔補〕剡木爲舟。剡木爲楫。舟楫之利。以濟不通。

〔補〕服牛乘馬。引重致遠。以利天下。

〔補〕重門擊柝。以待暴客。

〔補〕斷木爲杵。掘地爲臼。臼杵之利。萬民以濟。

〔補〕弦木爲弧。剡木爲矢。弧矢之利。以威天下。

〔補〕上古穴居而野處。後世聖人易之以宮室。上棟下宇。以待風雨。

〔補〕古之葬者。厚衣之以薪。葬之中野。不封不樹。喪期無數。後世聖人易之以棺槨。

〔補〕上古結繩而治。後世聖人易之以書契。百官以治。萬民以察。並同上

大戴記帝繫篇云。黃帝產元囂。元囂產嶠。極嶠極產帝辛。是爲帝嚳。帝嚳產稷。產契。產放勳。是爲帝堯。黃帝產昌意。昌意產高陽。是爲帝顓頊。顓頊產窮蟬。窮蟬產敬康。敬康產勾芒。勾芒產嶠牛。嶠牛產瞽瞍。瞽瞍產重華。是爲帝舜。顓頊產鯀。鯀產文命。是爲禹。其後司馬遷之五帝本紀。皇甫謐之帝王世紀。並因之。世之學者莫不信之。至宋。歐陽永叔帝王世次圖序及後序。始闢其謬。今載其文於左。

歐陽永叔帝王世次圖序。堯、舜、禹、湯、文、武。此六君子者。可謂顯人矣。而後世猶失其傳者。豈非以其遠也哉。是故君子之學。不窮遠以爲能。而闕其不知。慎所傳以惑世也。方孔子時。周衰。學廢。先王之道不明。而異端之說並起。孔子患之。乃述詩、書、史記。以止紛亂之說。而欲其傳之信也。故略

其遠而詳其近。於書斷自唐虞以來。著其大事。可以爲世法者而已。至於三皇五帝君臣世次。皆未嘗道者。以其世遠而慎所不知也。孔子旣沒。異端之說復興。周室亦益衰亂。接乎戰國。秦遂焚書。先王之道中絕。漢興久之。詩書稍出而不完。當王道中絕之際。奇書異說方充斥而盛行。其言往往反自託於孔子之徒。以取信於時。學者旣不備見詩書之詳。而習傳盛行之異說。世無聖人以爲質。而不自知其取捨真僞。至有博學好奇之士。務多聞以爲勝者。於是盡集諸說而論次。初無所擇。而唯恐遺之也。如司馬遷之史記是已。以孔子之學上述前世。止於堯舜。著其大略。而不道其前。遷遠出孔子之後。而乃上述黃帝以來。又詳悉其世次。其不量力而務勝。宜其失之多也。遷所作本紀。出於大戴禮。世本諸書。今依其說。圖而考之。堯舜夏商周皆同出於黃帝。堯之崩也。下傳其四世孫舜。舜之崩也。復上傳其四世祖禹。而舜禹皆壽百歲。稷契於高辛爲子。乃同父異母之兄弟。今以其世次而下之。湯與王季同世。湯下傳十六世而爲紂。王季下傳一世而爲文王。二世而爲武王。是文王以十五世祖。臣事十五世孫紂。而武王以十四世祖。伐十四世孫而代之。王何其謬哉。嗚呼。堯舜禹湯文武之道。百王之取法也。其盛德大業。見於行事。而後世所欲知者。孔子皆已論著之矣。其久遠難明之事。後世不必知。不知不害爲君子者。孔子皆不道也。夫孔子所以爲聖人者。其智知所取捨。皆如此。

永叔後序。予旣略論帝王世次。而見世紀之失。猶謂文武與紂相去十五六世。其謬較然不疑。而

堯舜禹之世相去不遠。尙冀其理有可通。乃復以尙書孟子孔安國皇甫謐諸書參考其壽數長短。而尤乖戾不能合也。據書及諸說云。堯壽一百一十六歲。舜壽一百一十二歲。禹壽百歲。堯年十六卽位在位七十年。年八十六始得舜而試之。二年乃使攝政。時舜年三十。居試攝政三十年而堯崩。舜服堯喪三年畢。乃卽位在位五十年而崩。方舜在位三十三年。命禹攝政。凡十七年而舜崩。禹服舜喪三年畢。乃卽位在位十年而崩。由是言之。當堯得舜之時。堯年八十六。舜年三十。以此推而上之。則是堯年五十七。已見四世之元孫生一歲矣。舜居試攝及在位通八十二年。而禹壽百年。以禹百年之間推而上之。禹卽位及居舜喪通十三年。又在舜朝八十二年。通九十五年。則當舜攝試之初年。禹纔六歲。是舜爲元孫年三十時。已見四世之高祖方生六歲矣。至於舜娶堯二女。據圖爲曾祖姑。雖古遠世異。與今容有不同。然人倫之理乃萬世之常道。必不錯亂顛倒之如此。然則諸家世次壽數長短之說。聖經之所不著者。皆不足信也。決矣。

余按春秋傳云。黃帝氏以雲紀。炎帝氏以火紀。共工氏以水紀。太皞氏以龍紀。少皞氏以鳥紀。自顓頊以來。乃紀於近。夫自黃帝以至顓頊。中間四五代而各有制作。不相沿襲。則顓頊與嚳之上距黃帝也遠矣。烏得以顓頊爲黃帝之孫而嚳爲黃帝之曾孫也哉。傳云。高辛氏有才子八人。高陽氏有才子八人。此十六族者。世濟其美。不隕其名。以至於堯。夫高辛高陽之子孫至於堯時。已各有分族而傳數世。則高辛高陽之下逮堯也。又遠矣。烏得以堯爲高辛之子而高陽之從孫也。

哉。書云：釐降二女於媯汭，嬪於虞。孟子云：堯之於舜也，九男事之，二女女焉。夫男女辨姓，人道之大防也。況於同高祖以下，其親屬尤近。果如大戴所記，堯於舜之高祖爲同高祖昆弟，堯安得以其女妻舜？舜安得遂取之？縱使上古之時，禮制未詳，然使堯舜而非聖人也，則可。堯舜而皆聖人也，必不爲是亂倫瀆禮之事明矣。且不告而娶，萬章猶疑之。孟子猶數辨釋之。若以近屬而爲姻婚，其所關者更大。何得萬章、孟子反皆不置一言？至其世數之參差，則歐陽子已言之。不待智者而知之矣。烏得謂堯舜禹之同出於黃帝也哉？惟舜出於顓頊，春秋傳嘗言之，而其名亦不符。然於陳言舜而但及於顓頊，不及於黃帝，則是以顓頊爲不出於黃帝也。於陳言舜而必及於顓頊，於范氏言陶唐而不及於黃帝，則是亦不以堯爲出於黃帝也。至國語始好牽連數姓以爲同出一祖，固已誣矣。然其所稱黃帝之後十二姓者，有祁而無姚，有姬而無子，姒則是猶未以唐、虞三代爲皆出於黃帝也。自戰國以後，楊、墨並起，而楊氏尤好爲大言，以儒者之稱堯舜而述孔子也。乃稱黃帝以求加於堯舜，述老聃以求加於孔子，故其後遂稱爲黃老，猶以爲未足快其意。乃又誣孔子爲老聃之弟子，堯舜禹湯文武爲黃帝之子孫，以見夫儒者之所推崇而尊重者，實皆吾師之末流餘派也。大戴諸篇本戰國以後所撰，是以惑於其說而載之，而司馬氏故崇黃老，其信而采之尤不足怪。獨怪漢晉以降千有餘年，文人學士自命爲聖人之徒者，不知凡幾，而皆以爲實然。此何說也？唯歐陽子獨能取信於經而不從楊、墨之邪說，其誠可不謂卓哉。乃此論既出，而

自宋以來編纂古史者猶沿大戴史記之謬。則尤可怪矣。豈以歐陽子之論猶有未盡耶。故余既全錄歐陽子之文。而於黃帝、堯、舜、篇中復爲推其前後而詳辨之。期於永絕世儒之疑。杜、楊、墨之說。雖其詞煩於古人而不敢避也。後世果有大儒出焉。庶知余心之獨苦耳。說並見後唐虞錄中。史記五帝本紀云。黃帝崩。高陽立。是爲帝顓頊。顓頊崩。高辛立。是爲帝嚳。帝嚳崩。摯代立。帝摯立。不善崩。弟放勳立。是爲帝堯。以爲古帝皆相繼而立者。帝王世紀衍之。復據漢書而小變其說。謂黃帝在位百年。年百一十一歲。其後少皞在位八十年。年百歲。其後乃爲顓頊。在位七十八年。年九十八歲。帝嚳在位七十年。年百五歲。摯在位九年。造唐而致禪。後之輯古史者大率本其年數以爲上古甲子之實。余按少皞、顓頊不繼黃帝。前篇固已詳言之矣。然卽少皞至堯四代中更無他天子。而亦前後不相及也。國語云。少皞之衰。九黎亂德。顓頊受之。少皞旣衰。顓頊乃興。是顓頊與少皞不相及也。傳云。高陽氏有才子八人。高辛氏有才子八人。此十六族者世濟其美。不隕其名。以至於堯。高陽、高辛至堯時已數世而分數族。是堯與二代亦不相及也。然則上古帝王其交會之間皆當有數十百歲。此衰而後彼興。正如春秋之霸者然。安得有相繼爲天子者哉。蓋凡說上古者皆以後世例之。故誤以爲相承不絕。不知古之天子無禪無繼。有一聖人出焉。則天下皆歸之。而謂之帝。聖人旣沒。則其子孫降而夷於諸侯。又數十百年復有聖人出。則天下又歸之。如是而已。自唐虞逮夏初。天子相繼。而天下之局始一變。少康以後又一變。至周又小變。而秦漢以

下則又大變。學者知上古自上古。虞夏自虞夏。商周自商周。則經傳之文皆了然不待解。啓之繼統。湯武之革命。皆顯然無可疑矣。余嘗讀春秋傳。襄昭之世較之定哀已不同。閔僖又不同。隱桓之世則迥乎判然矣。二百餘年之間猶如此。況自平王以上。至於義農黃帝之時。上下三千年。安得以一例例之乎。至其年歲尤屬無徵。上世既無典籍。經傳又乏明文。卽廣搜博采。不辨真僞。如司馬遷者。猶且不能言其年歲。彼皇甫謐生於晉代。又安從而知之。東方朔告武帝云。陛下以臣爲欺妄。願使人上天問之。世之述上古之年歲者。何以異是。故今概不之采。但取傳所載之帝。因其先後次第之說。並見前神農及後堯舜禹諸篇中。

韓詩外傳載子夏之言云。黃帝學乎大墳。顓頊學乎祿圖。帝嚳學乎赤松子。堯學乎務成子。附。舜學乎尹壽。禹學乎西王國。湯學乎貸子相。文王學乎錫疇子斯。余按大墳以下八人。無見於經傳者。而有間見於莊列異端之書者。則此語乃楊墨之所託言可知也。商周之世。詩書具在。何以無一言及之乎。詩傳妄採異端之說。又僞託爲子夏之言。不亦誣古人而惑後世乎。新序亦載此語。而文小異。蓋卽本之詩傳。而記有差池者。故今皆不錄。

世傳上古樂名。樂記有大章。咸池。周官有雲門。大卷。大咸。而皆不言何人所作。樂緯以咸池爲黃帝樂。大章爲堯樂。如是。則當先言咸池。何以樂記乃先大章。而後及咸池也。鄭注謂咸池卽大咸。乃黃帝樂。堯增修而用之。以曲爲解。然特出於猜度。非有確據。而一代之樂。功德所存。堯亦不應

無故改黃帝之樂。使後人不得見其真也。孔、賈二疏又曲爲鄭注解。謂大章卽大卷。與咸池皆黃帝之樂。堯增修者。存其本名曰咸池。不增修者。別爲立名曰大章。至周又改名爲雲門。其說尤爲紆曲。何者。堯亦聖人。何爲不自作樂。而但增修前代之樂。改前代之樂名以爲己樂。且增修者宜改名。而反仍其舊名。不增修者不當改名。而反別立新名。倒行逆施。莫此爲甚。而堯旣改之矣。周又改之。義何取焉。按堯以前之樂。無見於經傳者。春秋傳季札之觀樂。亦上至韶而止。蓋上古天下未平。民害尙多。未去聖人爲之制衣服。飲食。宮室。書契之屬。日不暇給。以故未遑作樂。不則有之。而世遠年湮。不傳於後世也。戰國以來。學者多好揣度附會。談上古之事。記者各據所聞記之。是以互相差異。爲注疏者。輕於取信。而不加別擇。務曲爲之說。使之兩全不悖。是以展轉反覆。而卒不可通也。樂緯又稱顓頊作五莖。帝嚳作六英。而周官樂記皆無之。劉歆以爲周遷其樂。賈氏以爲遵黃帝之道。無所改作。夫古聖人之樂。果存於周。周人當愛護之不暇。何故而反遷之。豈必改黃帝之道。然後其樂可存乎。然則自堯以前。本無樂傳於後。而樂緯妄名之也。明矣。嗟乎。後之儒者。皆知尊聖經。而黜讖緯矣。然所述帝王之事。大率皆本於緯書。雖襲緯書之說。而殊不自知也。其亦可歎也已。故今一概不錄。

大戴記五帝德篇云。黃帝黼黻衣。大帶黼裳。乘龍展雲。顓頊乘龍。而至四海。帝嚳春夏乘龍。秋冬乘馬。黃黼黻衣。余按乘龍之說。最爲荒唐。蓋本方士之言。黼黻衣裳。亦屬約略之詞。本紀刪之。是

也。所謂其文不雅馴者，蓋謂此等。故今亦不錄。嗟乎！司馬遷猶惡其不雅馴而刪之者，後之學者反或廣搜不雅馴之文以增之，亦獨何哉！

〔補〕木正曰句芒，火正曰祝融，金正曰蓐收，水正曰元冥，土正曰后土。左傳昭公二十九年

〔補〕少皞氏有四叔，曰重，曰該，曰修，曰熙，實能金木及水，使重爲句芒，該爲蓐收，修及熙爲元冥，世不失職，遂濟窮桑。同上

〔補〕顓頊氏有子曰犛，爲祝融，共工氏有子曰句龍，爲后土。同上

〔補〕有烈山氏之子曰柱，爲稷。同上

〔存參〕少皞之衰也，九黎亂德，民人雜揉，不可方物，夫人作享，家爲巫史。○顓頊受之，乃命南正重司天以屬神，命火正黎司地以屬民，使復舊常，無相侵瀆。楚語

〔存參〕黎爲高辛氏火正。鄭語

按傳文，重乃少皞氏之子，世不失職，遂濟窮桑，似卽官於少皞世者，而楚語謂顓頊命重司天，又似重於顓頊氏，乃爲句芒者，可疑一也。黎本顓頊氏之子，故楚語稱顓頊命黎司地，而鄭語又云，黎爲高辛氏火正，大戴記云，高辛是爲帝嚳，則是黎於嚳世，乃爲祝融，可疑二也。周書云，遏絕苗民，無世在下，其後乃云，乃命重，黎絕地，天通三苗之竄在堯舜世，又似重、黎非顓頊所命者，楚語雖云，堯育重、黎之後，使復興之，要是曲全其說，究與周書文義不合，可疑三也。鄭語以楚爲祝融

之後而楚語云其在周程伯休父其後也當宣王時失其官守而爲司馬氏則又不似楚之先君也者可疑四也重黎本二人程伯與司馬氏重之後與黎之後與何得不別而言之可疑五也上古本無典籍可稽而國語文多附會又不出於一人之手是以互相矛盾卽呂刑亦非典謨可比伯夷典刑之誤昔人已言之矣皆未容據此而駁彼也烈山氏亦不知爲何代人鄭氏以爲神農杜氏以爲神農時諸侯妄皆想當然非有所據也故今統列之於諸帝之後而不敢以某代繫之闕疑也志慎也

後論一則

近代纂古史者咸云伏羲以木德王神農以火德王黃帝以土德王少皞以金德王顓頊以水德王帝嚳堯舜以降皆以五行周而復始余按帝王之興果以五德終始則此乃天下之大事也二帝之典三王之誓誥必有言之者卽不言若易春秋傳窮陰陽之變徵黃炎之事述神怪之說詳矣亦何得不置一言也下至國語大戴記所稱五帝事最爲荒唐然猶絕無一言及之然則是戰國以前原無此說也明矣洪範曰水曰潤下火曰炎上木曰曲直金曰從革土爰稼穡不言其爲帝王受命之符也夫天下之事孰有大於帝王受命者曲直從革之屬抑末矣何故舍其大者不言而但言其細者乎傳曰黃帝氏以雲紀炎帝氏以火紀共工氏以水紀太皞氏以龍紀少皞氏以鳥紀是帝王之興各因物以取義不必於五行也各因義以立名無所謂終始也不然以水以

火可矣。以雲、龍、鳥、何說焉。傳曰：陳、水族也。又曰：衛、顓頊之虛也。其星爲大水。此自謂顓頊之應乎水耳。非謂帝王皆以五行相終始也。若皆以五行相終始，則舜以土德王，何以論陳者不近係之舜之土，而反遠係之顓頊之水乎。夫五行之說，昉於洪範。上古帝王之事，詳於春秋傳。洪範不言春秋傳之說不合，然則是爲五德終始之說者，乃異端之論，而非聖賢之旨也。明矣。五德終始之說，起於鄒衍，而其施諸朝廷政令，則在秦并天下之初。史記封禪書及始皇本紀，孟子荀卿列傳言之詳矣。其說以爲黃帝得土德，黃龍地螾見，夏得木德，青龍止於郊，殷得金德，銀自山溢，周得火德，有赤鳥之符，皆以所不勝者遞推之。是以秦之代周，自謂水德，而漢賈誼、公孫臣皆謂漢當土德。太初改制，服色尙黃，用衍說也。蓋自周道旣衰，異端並起，大略分爲六術。史記自敘所謂儒、墨、道德、名、法、陰陽是也。陰陽之術，其初疑亦本於楊氏，而衍以專門名家，遂別爲一術。是以漢志九流，次陰陽於道家，法家之間，而其書目有騶子四十九篇，騶子終始五十六篇。史記亦云：騶衍以陰陽主運，顯於諸侯，燕、齊海上之方士，傳其術，怪迂阿諛苟合之徒。自此不可勝數也。則是司馬遷固已非之矣。且龍止，銀溢，皆荒唐無可證。赤鳥之符，雖見於河內女子之秦誓，然白魚入舟，不又爲金德乎。此固大雅君子所不道也。以秦之愚，至於焚詩書，求神仙，其爲衍說所欺固宜。後之學者，何爲而亦爲其所欺耶。然衍雖有五德終始之說，而初不以母傳子，固未嘗以木、火、土、金、水爲五帝相承之次第也。以母傳子之說，始於劉氏向、歆父子，而其施諸朝廷政令，革故說，從新

制則在王莽篡漢之時。漢書律曆郊祀兩志及王莽傳言之詳矣。其學以爲庖羲繼天而王。爲百王先。德始於木。其後以母傳子。終而復始。自神農、黃帝、下歷唐、虞、三代。而漢得火焉。故高祖始起。神母夜號。著赤帝之符。共工氏以水德間於木火。與秦同運。非其次序。故皆不永。是以王莽自言火德銷盡。土德當代。而光武之起。亦據赤伏符之文。改漢爲火德。用歆說也。蓋自呂氏春秋始以五帝分配五行。春帝太皞。夏帝炎帝。秋帝少皞。冬帝顓頊。季夏之帝黃帝。向見此文。遂以爲其世之先後固然。而太皞、炎帝乃庖羲、神農之異名。不知炎帝、太皞自在黃帝之後。秦、漢以前從未有以爲卽庖羲、神農者。呂紀所云。但謂五帝之德各有所主。正如句芒以下五官各擅其神者然。非以此爲先後之序也。安得公然遂取帝王相繼之序。顛倒置之。廢傳記之明文。任揣度之私智乎。且衍之說雖誣。然殷尙白。周尙赤。猶有可附會之端。若歆所說周爲木德。則何爲不尙青而尙赤也。乃強爲之解曰。尙其德所生也。不尙其德而尙其德所生。有是理乎。而殷又不尙其所生而尙其所由生。此又何說焉。至於蛇母之哭。野人相傳之妄語耳。不然。則篝火狐鳴之小智耳。豈遂得以此定千古之疑。斷帝王之前後哉。若夫水之繼木。其世不永。謂秦可也。唐、虞以前皆不傳子。不得獨以不永貶共工也。莽以土繼火。可謂次序矣。何爲亦不永乎。以莽之詐。方且借虞書。託周官以飾其篡。其用歆說以欺天下固宜。後之學者何爲而皆祖述其欺人之言耶。嗟夫。自光武以之爲國典。班固載之於國書。魏、晉以後遂皆以爲其事固然。至於唐、宋。讖緯之學雖衰。而學者生而

卽聞五德之說。遂終身不復疑。亦不復知其說之出於衍與歆矣。且夫衍、歆之學。稍知道術者所不屑稱也。然其所創之說。則後世之大儒碩學皆遵之不敢異。寧背經傳而不敢背此二人之言。亦可謂慎矣。故今概不取。太皞、炎帝在黃帝後。說已詳前篇中。